



# A-N-T-I

## ALIANSA NASIONAL TIMOR-LESTE BA TRIBUNAL INTERNASIONAL

Sekretáriu; Asosiasaun HAK

Rua Gov. Serpa Rosa

T-091, Faról, Dili, Timor-Leste

Tel: +670-3321040 or +67077289241 or 77367518 / 77179655

e-mail: [lanarra.del@gmail.com](mailto:lanarra.del@gmail.com) or [atino@laohamutuk.org](mailto:atino@laohamutuk.org), [moniz@jsmp.minihub.org](mailto:moniz@jsmp.minihub.org)

Website: [www.laohamutuk.org/www.jsmp/www.haktl.org](http://www.laohamutuk.org/www.jsmp/www.haktl.org).

### **Benvindu Prezidente SBY mai vizita Timor-Leste! “Labele fase liman ba krime kontra umanidade husi 1975-1999.**

Tuir informasaun ofisiál husi pájina Governu Timor-Leste<sup>1</sup> katak iha loron 26 too 27 fulan Agostu Prezidente Repúblika Indonézia Susilo Bambang Yudiono (SBY) sei mai vizita Timor-Leste tuir konvite husi autoridade Timor-Leste nian. Parese, katak SBY nia vizita ne'e sei ko'alia ho lider Timor-oan sira kona-ba asuntu fronteira rai leten nian, semitériu militar Indonézia nian no saudozu Timor oan ne'ebé militar Indonézia uluk oho no halakon, tuir informasaun iha media (<http://www.timorhauniandoben.com/2014/07/vizita-ultimu-sby-posibilidade-hatudu.html>).

ANTI aproveita vizita SBY nian hodi fó “Benvindu” no alerta ba públiku ho involvimentu iha sistema rejime “Orde Baru Suharto” nian. Hanesan ema barak hatene Susilo Bambang Yudihono nudár komandante militar hola parte iha rejime kruél Soeharto ne'ebé halo okupasaun ilegál hodi oho no haterus povu Timor-Leste durante tinan 24. Durante okupasaun ilegál ne'e, militar Indonézia komete krime kontra umanidade hasoru povu Timor sistemátiku no planeiadu. Tuir relatóriu Chega<sup>2</sup> militar Indonézia oho no halakon ema hamutuk besik na'in 18,600, ho kumplisidade husi comunidade internasionál ne'ebé fó apoiu ba Indonézia. Populasaun sivíl sira ne'ebé mate liu husi forma barak; balun mate tanba kona bombardiaru, balun mate tanba tortura, balun mate tanba oho subar, balun mate hamlaha tanba laiha liberdade ba povu atu dezenvolve atividade ekonomia.

Depois Indonézia sai husi Timor-Leste, Nasoins Unidas harii Unidade ba Krime Grave<sup>3</sup> sira no Panel Espesial ida hodi investiga, julga no akuza ba autór sira ne'ebé envolve iha krime grave sira durante tinan 1999 (la konsidera periodu 1975 too 1998). Rezultadu husi mekanizmu justisa rua ne'e hatudu kriminozu prinsipál sira ba fase liman de'it iha tribunal iha Jakarta kompara halo julgamentu loloos. Prosesu julgamentu ne'e mós hetan

<sup>1</sup> <http://timor-leste.gov.tl/?p=10231&lang=tp>

<sup>2</sup> <http://www.cavr-timorleste.org/cheгаFiles/Cheга!%20Sumariu%20Eksekutivu%20%28Tetum%29.pdf>

<sup>3</sup> <http://etan.org/news/2005/06exec.htm#SCU>

presoun husi polítiku sira iha Indonézia no estadu Indonézia ne'ebe la hatudu nia kooperasaun di'ak ba tribunal refere.

Nasoins Unidas estabelese Komisaun Inkéritu ida hodi halo avaliasaun ba servisu sira kona-ba krime grave refere iha Indonézia no Timor-Leste. Husi komisaun hotu rekomenda katak Nasoins Unidas presiza foti medida adekuaudu hodi harii Tribunal Internasionál ba krime kontra umanidade bainhira Indonézia kontinua tau obstákulu ba prosesu justisa loloos. Maibé too agora comunidade internasionál inklui Nasoins Unidas seidauk foti asaun ruma hodi buka solusaun loloos ba kazu krime grave durante okupasaun ne'e. Atu hatán ejijénsia ba harii Tribunal Internasionál, Indonézia husu harii tribunal ad-hoc<sup>4</sup> hodi julga kriminozu sira.

Nudár Prezidente Repúblika periodu rua iha Indonézia Susilo Bambang Yudhoyono falla lori solusaun ba kazu krime grave ne'e. Nia la koko implementa rekomendasaun husi relatóriu sira inklui simplesmente harii Komisaun Nasionál ida ba buka Timor-oan sira ne'ebé lakon durante okupasaun hanesan hakerek iha relatóriu husi Komisaun Amizade<sup>5</sup> no Rekonsiliaun (CVA). Ne'e hatudu katak SBY no estadu Indonézia laiha vontade no kontinua taka dalan ba justisa ba krime kontra umanidade.

Sobrevivente sira no sira hotu ne'ebé buka justisa ba kazu krime kontra umanidade ne'e too agora kontinua buka no ezije ba comunidade internasionál atu implementa rekomendasaun sira husi Relatóriu Chega, Relatóriu KPP-HAM<sup>6</sup>, Komisaun Inkéritu ONU<sup>7</sup> nia liu-liu rekomendasaun sira kona-ba medida hakotu impunidade liu husi julgamentu kriminozu sira iha Tribunal Internasionál ne'ebé justu no kredível. Sobrevivente sira mós kontinua ezije ba nasaun boot sira hanesan USA, Inglaterra, Australia no sira seluk ne'ebé apoiu ka hetan benefísiu husi okupasaun ne'e atu ajuda dudu prosesu hodi hakotu impunidade no buka dalan ba fornese justisamak justu no kredível ba povu Timor-Leste.

ANTI ezije ba Governu Timor-Leste no Indonézia atu hahú loke ona vontade política hodi buka solusaun justu ba kazu krime kontra umanidade sira durante Okupasaun inklui harii Komisaun Nasionál ba buka tuir Timor oan sira ne'ebé halakon forsadamente. "Relatóriu Komisaun Peritu Nasoins Unidas nia hateten katak mekanizmu hotu ne'ebé nasoins Unidas suporta la hetan akuntabilidade ida ne'ebé di'ak tanba ne'e rekomenda ba Konsellu Seguransa ONU nian atu harii tribunal kriminál Internasionál ida ne'ebé justu no kredível.

#### **Faktu krime kontra umanidade sei kontinua eziste too ohin loron:**

- Família sira seidauk hatene paradeiru sira nia la'en, feen, maun, oan ne'ebé militar Indonesia lori lakon sei kontinua lakon too ohin loron.
- Labarik Timor-oan sira ne'ebé militar Indonesia lori ba Indonesia agora sei nafatin separa husi sira nia família.

<sup>4</sup> <http://etan.org/news/2005/06exec.htm#ad%20hoc>

<sup>5</sup> <http://etan.org/news/2005/06exec.htm#Commission%20of%20Truth%20and%20Friendship>

<sup>6</sup> <http://www.etan.org/news/2000a/3exec.htm>

<sup>7</sup> <http://www.etan.org/etanpdf/pdf3/N0542617.pdf>

- Autór sira ne'ebé komete iha krime kontra umanidade agora nafatin goza nia liberdade iha territóriu Indonézia.
- ANTI espera katak parte hotu ne'ebé ami temi bele simu ami nia preokupasaun ne'e. Bele hetan informasaun tan kona-ba krime grave ho krime kontra umanidade durante okupasaun Militár Indonézia nian bele liga iha:

<http://www.laohamutuk.org/Justice/JusticeIndex.html#InternationalCrimes>,  
<http://www.haktl.org/ami-nia-programa/direitu-ba-justisa-krimi-pasadu/>

Dili, 22 Agostu 2014

Sisto dos Santos  
Koordenadór Board ANTI